

Broj: 65/14

Datum, 01. muharrem 1436. h.g.

25. oktobar 2014. godine

Na osnovu člana 68. stav 2. Ustava Islamske zajednice u Bosni i Hercegovini-prečišćeni tekst i člana 10. stav 1. tačka 3. Zakona o slobodi vjere i pravnom položaju crkava i vjerskih zajednica u Bosni i Hercegovini („Službeni glasnik BiH“, broj 5/04), Sabor Islamske zajednice u Bosni i Hercegovini na desetoj redovnoj sjednici održanoj u Sarajevu dana 01. muharrema 1436. h.g., odnosno 25. oktobra 2014. godine, donio je

## **PRAVILA O USTANOVAMA ISLAMSKJE ZAJEDNICE U BOSNI I HERCEGOVINI**

### **I OSNOVNE ODREDBE**

#### **Član 1.**

(Predmet Pravila)

Ovim Pravilima se uređuju i definišu: osnivanje ustanova Islamske zajednice u Bosni i Hercegovini (u daljem tekstu: ustanova), djelatnost, statusne promjene i udruživanje ustanova, sjedište i naziv, organi upravljanja, rukovođenja i drugi organi, opći akti, sredstva za rad i odgovornost za obaveze u pravnom prometu, nadzor nad radom, upis u registre, prestanak rada ustanove.

#### **Član 2.**

(Ustanova)

(1) Ustanova, u smislu ovih Pravila, osniva se za obavljanje djelatnosti odgoja, obrazovanja, nauke, kulture, fizičke kulture, zdravstva, dječije zaštite, socijalne zaštite, socijalne sigurnosti i drugih djelatnosti utvrđenih ovim pravilima, ako cilj obavljanja djelatnosti nije sticanje dobiti.

(2) Ustanova ima svojstvo pravnog lica.

#### **Član 3.**

(Javna ustanova)

(1) Ustanova može imati status javne ustanove.

(2) Javna ustanova obavlja djelatnost od zajedničkog javnog interesa Islamske zajednice u Bosni i Hercegovini (u daljem tekstu: Islamska zajednica) i države.

(3) Odluku o utvrđivanju statusa javne ustanove donosi nadležna skupština kada ocijeni da za njeno osnivanje postoji javni interes.

(4) Međusobna prava i obaveze Islamske zajednice, kao osnivača javne ustanove, i nadležnog državnog organa regulirat će se posebnim ugovorom.

## II OSNIVANJE USTANOVE

### Član 4.

(Osnivanje ustanove)

- (1) Ustanova može biti osnovana ako su ispunjeni uvjeti za osnivanje i početak rada ustanove, u skladu s ovim Pravilima.
- (2) Sredstva za ispunjenje uslova iz stava 1. ovog člana obezbjeđuje osnivač.
- (3) Ustanovu mogu osnovati, zajedno s Islamskom zajednicom, i druga pravna ili fizička lica.
- (4) Ako ustanovu osniva Islamska zajednica zajedno s drugim pravnim ili fizičkim licem, njihova međusobna prava i obaveze i odgovornosti uređuju se ugovorom, koji se zaključuje u pismenoj formi.
- (5) Islamska zajednica može prenijeti prava i obaveze osnivača i na drugo pravno ili fizičko lice.
- (6) Aktom o prenošenju prava i obaveza osnivača uređuje se način zaštite prava korisnika usluga i druga pitanja od značaja za promjenu osnivača ustanove.
- (7) Ustanova ne može početi da obavlja djelatnost dok nadležni organ uprave koji vrši nadzor nad zakonitosti rada rješenjem ne utvrdi da su ispunjeni uslovi utvrđeni zakonom.

### Član 5.

(Osnivački akt ustanove)

- (1) Rijaset Islamske zajednice u Bosni i Hercegovini (u daljem tekstu: osnivač) donosi akt o osnivanju ustanove.
- (2) Akt o osnivanju ustanove sadrži:
  - naziv osnivača,
  - naziv i sjedište ustanove,
  - djelatnost ustanove,
  - iznos sredstava za osnivanje i početak rada i način njihovog obezbjeđivanja,
  - izvore i način obezbjeđivanja sredstava za rad ustanove,
  - međusobna prava i obaveze između osnivača i ustanove,
  - način raspolaganja viškom prihoda nad rashodima i način na koji se pokriva višak rashoda nad приходima,
  - prava, obaveze i odgovornost ustanove u pravnom prometu,
  - lice koje će do imenovanja organa rukovođenja predstavljati i zastupati ustanovu i njegova ovlaštenja i odgovornosti,
  - rok za donošenja pravila ustanove, imenovanje organa upravljanja i rukovođenja ustanove,
  - druga pitanja od značaja za rad ustanove.

### **III DJELATNOST, STATUSNE PROMJENE I UDRUŽIVANJE USTANOVA**

#### **Član 6.**

(Djelatnost ustanove)

- (1) Ustanova može obavljati više djelatnosti iz člana 2. ovih pravila, ako ispunjava uslove, utvrđene ovim pravilima, za svaku od tih djelatnosti.
- (2) Ustanova može, bez upisa u sudski registar, da obavlja privrednu djelatnost i privrednu aktivnost radi zbrinjavanja poslovno nesposobnih lica i profesionalnog osposobljavanja i zapošljavanja invalidnih lica, u manjem obimu ili povremeno, ako ta djelatnost odnosno aktivnost služi ostvarivanju djelatnosti, odnosno izvršavanju poslova radi kojih je ustanova osnovana.
- (3) Ustanovi se mogu povjeriti ovlaštenja iz djelokruga organa Islamske zajednice za vršenje i stručnih poslova, u skladu s ovim pravilima.
- (4) Pravilima ustanove može se utvrditi da dio ustanove ima određena ovlaštenja u pravnom prometu, kao i poseban obračun rezultata poslovanja, u skladu sa zakonom.
- (5) Dio ustanove iz stava 1. ovog člana nema svojstvo pravnog lica.

#### **Član 7.**

(Statusne promjene ustanove)

- (1) Ustanova može proširiti ili promijeniti djelatnost, kao i vrstu statusne promjene: spajanje, pripajanje, podjelu i izdvajanje.
- (2) Odluku iz stava 1. ovog člana donosi osnivač.

#### **Član 8.**

(Spajanje ustanova)

Osnivači ustanova koje su se spojile odlučuju o preuzimanju prava i obaveza osnivača prema ustanovi koja je nastala spajanjem.

#### **Član 9.**

(Podjela ustanove)

- (1) Osnivač ustanove koja se podijelila i ustanove iz koje se odvojio dio u samostalnu ustanovu odlučuje o preuzimanju prava i obaveza osnivača prema ustanovama koje su nastale podjelom, odnosno prema ustanovi koja je nastala izdvajanjem.
- (2) Prava i obaveze osnivača prema ustanovi koja se pripojila drugoj ustanovi prestaju danom upisa akta o pripajanju u registar.

(3) U slučaju statusne promjene ustanove imovinska i druga prava i obaveze uređuju se ugovorom.

#### **Član 10.**

(Povjeravanje poslova drugoj ustanovi)

(1) Ustanova može ugovorom povjeriti drugoj ustanovi, preduzeću ili fizičkom licu obavljanje administrativno-tehničkih pomoćnih poslova, u skladu sa zakonom.

### **IV SJEDIŠTE I NAZIV USTANOVE**

#### **Član 11.**

(Sjedište ustanove)

(1) Sjedište ustanove je mjesto u kome se obavlja djelatnost radi koje je ustanova osnovana.

(2) Ako se djelatnost obavlja u više mjesta, sjedištem se smatra mjesto koje je određeno pravilima ustanove.

(3) Ustanova može promijeniti sjedište uz saglasnost osnivača.

(4) Odluka o promjeni sjedišta ustanove donosi se na način utvrđen pravilima ustanove.

#### **Član 12.**

(Naziv ustanove)

(1) Naziv ustanove je ime pod kojim ustanova radi. Ustanova može promijeniti naziv uz saglasnost osnivača.

(2) Odluka o promjeni naziva ustanove donosi se na način utvrđen pravilima ustanove.

(3) Naziv ustanove upućuje na djelatnost i sjedište ustanove.

#### **Član 13.**

(Skraćeni naziv ustanove)

(1) Ustanova može imati i skraćeni naziv.

(2) Naziv i skraćeni naziv mora se istaknuti na ulazu u poslovne prostorije ustanove.

(3) U naziv ustanove može se unijeti ime historijske i druge znamenite ličnosti u skladu sa zakonom.

## V ORGAN UPRAVLJANJA, RUKOVOĐENJA I DRUGI ORGANI U USTANOVU

### Član 14.

(Organi ustanove)

- (1) Organ upravljanja u ustanovi je upravni odnosno školski odbor (u daljem tekstu: upravni odbor).
- (2) Organ rukovođenja u ustanovi je direktor, upravnik, dekan ili drugi odgovarajući poslovodni organ (u daljem tekstu: direktor).
- (3) Organ kontrole poslovanja u ustanovi je nadzorni odbor.

### Član 15.

(Sastav i imenovanje upravnog odbora ustanove)

- (1) Upravni odbor ima najmanje tri, a najviše devet članova.
- (2) Predsjednika i članove upravnog odbora ustanove ili javne ustanove imenuje i razrješava osnivač.
- (3) Jedna trećina članova upravnog odbora, po pravilu, imenuje se iz reda stručnih zaposlenika u ustanovi.
- (4) Predsjednik i članovi upravnog odbora imenuju se na mandat od četiri godine uz mogućnost još jednog izbora.
- (5) Direktor ili pomoćnik direktora ustanove ne može biti član upravnog odbora.
- (6) Broj članova upravnog odbora bliže se određuje pravilima ustanove, u skladu sa zakonom ili aktom o osnivanju ustanove.

### Član 16.

(Razrješenje upravnog odbora ustanove)

- (1) Osnivač može razriješiti upravni odbor, predsjednika i člana upravnog odbora i prije vremena za koje je imenovan, ako utvrdi da je odgovoran za neuspješan ili nezakonit rad ustanove, na njegov zahtjev i u drugim slučajevima utvrđenim ovim pravilima i pravilima ustanove.

### Član 17.

(Nadležnosti upravnog odbora ustanove)

- (1) Upravni odbor:
  - donosi pravila ustanove, uz saglasnost osnivača,
  - imenuje i razrješava direktora, uz saglasnost osnivača,
  - utvrđuje planove rada i razvoja,
  - utvrđuje godišnji program rada,
  - donosi finansijski plan i usvaja godišnji obračun,

- donosi opći akt o unutrašnjoj organizaciji i sistematizaciji poslova i druge opće akte, u skladu sa zakonom i pravilima ustanove,
- odlučuje o svim pitanjima obavljanja djelatnosti radi koji je ustanova osnovana, ako ovim pravilima nije određeno da o određenim pitanjima odlučuje drugi organ ustanove,
- usmjerava, kontrolira i ocjenjuje rad direktora,
- rješava sva pitanja odnosa s osnivačem,
- odgovara osnivaču za rezultate rada ustanove,
- odlučuje o prigovoru zaposlenika na rješenje kojim je drugi organ, određen pravilima ustanove, odlučio o pravu, obavezi i odgovornosti zaposlenika iz radnog odnosa,
- podnosi osnivaču najmanje jedanput godišnje izvještaj o radu i finansijskom poslovanju ustanove,
- vrši i druge poslove u skladu sa zakonom i pravilima ustanove.

### **Član 18.**

(Odlučivanje upravnog odbora ustanove)

(1) Upravni odbor donosi odluke većinom glasova svih članova, ako pravilima za odlučivanje o pojedinim pitanjima nije određena druga kvalificirana većina.

### **Član 19.**

(Imenovanje direktora ustanove)

(1) Direktora ustanove ili javne ustanove imenuje upravni odbor na osnovu konkursa koji se objavljuje u javnim glasilima Islamske zajednice, uz saglasnost osnivača.

(2) Lice koje nije dobilo saglasnost za direktora od strane osnivača, ne može u ponovljenoj konkursnoj proceduri biti imenovano za direktora, odnosno vršioca dužnosti direktora.

(3) Ako se ne izvrši imenovanje direktora ustanove, upravni odbor imenuje vršioca dužnosti direktora.

(4) Izuzetno, u uslovima neposredne ratne opasnosti ili rata direktora imenuje i razrješava osnivač.

(5) Uslovi za imenovanje direktora utvrđuju se pravilima ustanove.

### **Član 20.**

(Imenovanje vršioca dužnosti direktora ustanove)

(1) Ako direktor nije imenovan, upravni odbor će, bez konkursa, imenovati vršioca dužnosti direktora iz reda stručnih zaposlenika u ustanovi.

(2) Vršilac dužnosti direktora ima sva prava i dužnosti direktora.

(3) Vršilac dužnosti direktora može rukovoditi ustanovom do imenovanja direktora, a najduže šest mjeseci od dana njegovog imenovanja.

### **Član 21.**

#### (Nadležnosti direktora ustanove)

(1) Direktor organizira i rukovodi radom ustanove, zastupa i predstavlja ustanovu prema trećim licima i odgovoran je za zakonitost rada ustanove.

(2) U ostvarivanju rukovođenja ustanovom, direktor:

- predlaže upravnom odboru mjere za efikasno i zakonito obavljanje djelatnosti radi kojih je ustanova osnovana,
- predlaže unutrašnju organizaciju i sistematizaciju poslova i osnove planova rada i razvoja,
- izvršava odluke upravnog odbora,
- odlučuje o pravima, obavezama i odgovornostima zaposlenika iz radnog odnosa, podnosi upravnom odboru izvještaj o finansijskom poslovanju i odgovoran je za rezultate rada i finansijsko poslovanje ustanove,
- nalogodavac je za vršenje finansijskog plana,
- vrši druge poslove u skladu s ovim pravilima i pravilima ustanove

(3) Direktor je dužan da obustavi od izvršenja opći akt ustanove koji je u nesaglasnosti s općim aktima Islamske zajednice ili zakonom, kao i pojedinačni akt koji je u suprotnosti s općim aktima i da o tome obavijesti nadležne organe koji vrše nadzor nad radom ustanove.

#### **Član 22.**

##### (Razrješenje direktora ustanove)

(1) Direktor može biti razriješen, uz saglasnost osnivača, i prije vremena za koje je imenovan:

- ako se utvrdi da je odgovoran za neuspješan ili nezakonit rad ustanove,
- na zahtjev direktora,
- u drugim slučajevima utvrđenim pravilima ustanove.

(2) Odluku o razrješenju direktora donosi upravni odbor uz saglasnost osnivača.

#### **Član 23.**

##### (Sastav i imenovanje nadzornog odbora ustanove)

(1) Nadzorni odbor ustanove ima tri člana.

(2) Predsjednika i članove nadzornog odbora imenuje i razrješava osnivač.

(3) Najmanje jedan član nadzornog odbora imenuje se iz reda stručnih zaposlenika u ustanovi.

(4) Predsjednik i članovi nadzornog odbora imenuju se na mandat od četiri godine uz mogućnost još jednog izbora.

#### **Član 24.**

##### (Nadležnosti nadzornog odbora ustanove)

(1) Nadzorni odbor:

- analizira izvještaje o poslovanju ustanove,
- u obavljanju nadzora nad upotrebom sredstava za rad, pregleda godišnji izvještaj o poslovanju i godišnji obračun,
- pregleda i provjerava urednost i zakonitost vođenja poslovnih knjiga,
- izvještava osnivača, upravni odbor i direktora o rezultatima nadzora.

#### **Član 25.**

(Razrješenje nadzornog odbora ustanove)

Osnivač može razriješiti nadzorni odbor, predsjednika i člana nadzornog odbora i prije vremena za koje je imenovan, ako utvrdi da je odgovoran za neuspješan ili nezakonit rad ustanove, na njegov zahtjev i u drugim slučajevima utvrđenim pravilima ustanove.

#### **Član 26.**

(Stručni i drugi organi ustanove)

Ustanova može imati stručne i druge organe, u skladu s pravilima ustanove.

### **VI OPĆI AKTI USTANOVE**

#### **Član 27.**

(Opći akti ustanove)

- (1) Osnovni opći akt ustanove su pravila ustanove.
- (2) Ustanova može imati i druge opće akte, u skladu sa zakonom i pravilima ustanove.

#### **Član 28.**

(Pravila ustanove)

- (1) Pravila ustanove sadrže odredbe o:
  - nazivu i sjedištu ustanove,
  - osnivaču ustanove,
  - obavezama ustanove prema osnivaču,
  - djelatnosti ustanove, načinu i uslovima obavljanja te djelatnosti,
  - pravima i obavezama dijela ustanove iz člana 10 ovih pravila,
  - statusnim promjenama,
  - načinu raspoređivanja sredstava za rad,
  - broju članova upravnog odbora,
  - imenovanju i razrješenju direktora,
  - drugim organima ustanove i njihovim pravima, obavezama, odgovornostima, uslovima i načinu njihovog izbora i razrješenja,
  - općim aktima koji se donose u ustanovi i načinu njihovog donošenja,
  - licima ovlaštenim da, pored direktora, zastupaju ustanovu i njihovim ovlaštenjima i odgovornostima,



- načinu ostvarivanja javnosti rada,
- drugim pitanjima utvrđenim zakonom i druge odredbe od značaja za rad ustanove i za ostvarivanje prava, obaveza i odgovornosti zaposlenika ustanove.

## **VII SREDSTVA ZA RAD I ODGOVORNOST ZA OBAVEZE U PRAVNOM PROMETU USTANOVE**

### **Član 29.**

(Sredstva za rad ustanove)

(1) Ustanova stiče sredstva za rad iz:

- sredstava osnivača,
- javnih budžeta,
- od naknade za obavljanje intelektualnih, obrazovnih, kulturnih, zdravstvenih i drugih usluga,
- prodajom materijalnih dobara,
- zakupnina,
- legata, poklona i vakufa,
- donacijama pravnih i fizičkih lica,
- drugih izvora u skladu sa zakonom i registriranom djelatnošću ustanove.

### **Član 30.**

(Odgovornost ustanove za obaveze)

(1) Ustanova je odgovorna za svoje obaveze.

(2) Osnivač je supsidijarno odgovoran za obaveze ustanove, ako aktom o osnivanju nije drugačije određeno.

(3) Kada je osnivač odgovoran za obaveze ustanove, dužan je da:

- pokrije višak rashoda nad prihodima ustanove, u roku od 60 dana od dana usvajanja godišnjeg obračuna,
- razriješi predsjednika i članove upravnog odbora, ako je ustanova za dvije uzastopne godine u godišnjem obračunu iskazala višak rashoda nad prihodima.

(4) U slučaju iz alineje 2 stava (3) ovog člana, upravni odbor dužan je da razriješi direktora ustanove, uz prethodnu saglasnost osnivača.

## **VIII IMOVINA**

### **Član 31.**

(Imovina)

(1) Ustanova stiče imovinu, upravlja njome i koristi se njome u skladu sa zakonom.

(2) Nepokretnosti i druga imovina ustanove obezbijedena od osnivača za osnivanje i rad ustanove imovina je osnivača, ako aktom o osnivanju ustanove nije drugačije određeno.

(3) Imovina stečena obavljanjem registrirane djelatnosti ustanove kao i imovina stečena na osnovu vakufa i poklona ili na drugi zakonit način svojina je ustanove koja je tu imovinu stekla.

(4) Imovina iz stava (3) ovog člana može se sticati samo u cilju obavljanja, razvijanja i unapređenja osnovne djelatnosti i ne može biti korištena u cilju promjene statusa ustanove ili uzurpacije prava osnivača od strane drugih subjekata ili same ustanove.

(5) Imovina iz stava (2) i stava (3) ovog člana ne može se otuđiti ili na neki drugi način opteretiti bez prethodne saglasnosti osnivača, a može se koristiti samo u cilju obavljanja registrirane djelatnosti, u skladu s ovim pravilima.

## **IX NADZOR**

### **Član 32.**

(Nadzor nad radom ustanove)

(1) Nadzor nad radom ustanove vrši osnivač.

(2) U vršenju nadzora nad radom osnivač ima pravo i dužnost da obustavi od izvršenja opći akt ustanove za koji smatra da nije usaglašen s ustavom Islamske zajednice, zakonom ili drugim općim aktom višega ranga.

(3) Ako je osnivač obustavio izvršenje općeg akta iz prethodnog stava, dužan je da u roku od osam dana od dana dostavljanja ustanovi rješenja o obustavi pokrene pred Ustavnim sudom Islamske zajednice postupak za ocjenjivanje ustavnosti obustavljenog akta i da o tome obavijesti donosioca tog akta.

(4) Ako nadležni organ ne postupi na način iz stava 2. ovog člana obustavljeni opći akt može se primijeniti po proteku roka od osam dana od dana dostavljanja ustanovi rješenja o obustavi.

## **X UPIS U REGISTRE**

### **Član 33.**

(Upis ustanove u registre)

(1) Ustanova se upisuje u Registar za Islamsku zajednicu kod Ministarstva pravde Bosne i Hercegovine, a po potrebi i u druge registre, u skladu sa zakonom.

(2) Ustanova stiče svojstvo pravnog lica upisom u registre iz stava 1. ovog člana.

(3) U registre se upisuje osnivanje, organiziranje, statusne i druge promjene i prestanak ustanove.

## **XI PRESTANAK RADA USTANOVE**

**Član 34.**  
(Prestanak rada ustanove)

(1) Ustanova prestaje s radom:

- ako više ne postoji potreba za obavljanje djelatnosti ustanove,
- ako prestanu da postoje uslovi za obavljanje djelatnosti ustanove,
- ako je ustanovi izrečena mjera zabrane bavljenja djelatnošću zbog toga što ne ispunjava uslove u skladu sa zakonom, a u roku određenom u izrečenoj mjeri nije ispunila te uslove,
- ako se pravosnažnom odlukom suda utvrdi ništavnost upisa u registar,
- ako je u nemogućnosti da ispunjava propisane obaveze, a aktom o osnivanju nije utvrđena odgovornost osnivača za te obaveze,
- ako se pripoji drugoj ustanovi, spoji sa drugom ustanovom ili podijeli na dvije ustanove,
- u drugim slučajevima određenim zakonom ili aktom o osnivanju.

(2) U slučajevima iz tačaka 1 do 5 stava (1) ovog člana akt o prestanku ustanove donosi osnivač.

(3) Aktom iz prethodnog stava utvrđuje se način zaštite prava korisnika usluga i druga pitanja od značaja za prestanak ustanove, u skladu sa zakonom i pravilima ustanove.

**X PRIJELAZNE I ZAVRŠNE ODREDBE**

**Član 35.**  
(Stupanje na snagu)

(1) Ova pravila stupaju na pravnu snagu danom usvajanja od strane Sabora Islamske zajednice u Bosni i Hercegovini, a objavit će se u Glasniku Rijasetu Islamske zajednice.

Predsjednik Sabora IZ-e  
Safet Softić